

nostre Eglise de la mission de s^t. Ignace a missilimakinac ou ils font leur demeure.

Ils se rendirent donc sur le lieu, et deliberent ensemble d'agir a l'esgard du pere suiuant ce qu'ils ont Coustume de faire enuers Ceux po⁹ qui ils ont bien du respect; Ils ouurent donc la fosse ils deuelopent le Corps, et quoy q⁹ la Chair et les Intestins fusent tous Consumés ils le trouuent entier sans que la peau fut en aucune facon endomagée, ce qui n'empcha pas qu'ils n'en fissent la dissection a leur ordinaire ils lauerent les os et les exposerent au soleil po⁹ les seicher, apres quoy les ayant bien rangés dans vne quaisse d'escorce de bouleau, ils se mirent en chemin po⁹ no⁹ les apporter en nostre mission de s^t. Ignace.

Ils estoient pres de 30 Canots qui faisoient sa conuoy avec vn tres bel ordre, il s'y trouua mesme vn tres bon nombre d'jroquois qui s'estoient joints a nos sauuages algonquins po⁹ faire plus d'honneur a cette ceremonie. quand ils aprocherent de nostre maison, le p nouuel qui y est sup^r. fut au deuant d'eux avec le p. piercon acompagné de ce qu'il y auoit de francois et de sauuages, et ayant faict arrester le Conuoy, il fit les interrogations ordinaires po⁹ verifier que C'estoit veritablement le corps du p. qu'ils apportoient, et auant que de le descendre a terre on Entonna le de profundis a la veüe de ces 30 Canots qui estoient tousjours a l'eau, et de tout le peuple qui estoit a terre. apres cela on porta le Corps a l'eglise gardant tout ce que le rituel marque en semblables ceremonies, il demeura exposé tout ce Jour la sous la representation qui fut la 2^{de}. feste de la pentecoste 8 de Juin et le l'endemain apres qu'on luy eut